

Als erschts do möcht ich mol Danke säge em Ärscht ond ohni z`Lache
das mer be euch Esther ond Thomas au weder dörfed Fasnacht mache
als Werte send er super spitze grandios megageil fenomenale
ond well ich euch eso grühmt ha dörfed er mer am Schloss eis zahle

Wad so öber de Bill Clinton ghörsch ond was ond was e de Zytig stoht
be dere Sexaffaire werd gottfredstoz jo s`Wysse Hus no rot
e eusem Bondeshus do trett gottseidank sone Affaire ned en chrafft
well det han ich no keine gseh wo met Freud ond Liebi schafft

Haschisch rauche ond Marihuana das esch gar ned gsond
das gelt ä för de Snowbordolympiasieger det en Nagano ond
sone Joint vernäblet der dis Herni er fahrt der so richtig i
ond den weisch nömm be wellere Frog d`Antwort Moldowan esch gsi

D`Martina Hingis seit voller Freud jetz lueg min Schatz er stoht
ich hocke dromm grad of en ue damet mer nüt entgoht
ond den gohts au scho los emmer uf ond ab bes d`Hingis plötzlech schreyt
ond den esches scho passiert Sie esch weder vom Ross abeghey

Cs Holding übernimmt d`Nab wo scho d`Volksbank esch integriert
ond jetz het au no der Bankverein met de Ubs fusioniert
also du wenn das so wyter goht hämmer of einisch es esch zom gruuse
z`Brogg ond glich vell Banke we Läden vo de Beate Uhse

Wend White heisch oder Luginbühl es esch zom devolaufe
de chasch e hampfle lise am Strosserand de Lüt als Konscht verchäufe
hät ich aber met somme Rosthuufe eusi Cherschackerstross verziert
jo ded wär ich jetz be de Gmei ond als Abfallsönder registriert

Do stoht jetz also die Kamera em Osserdorf vore ame Morge
ond felmt jetz jede wo ilegal sin Abfall duet entsorge
bes z`letscht tüends den bem Ögruhus au sone Kamera ischhalte
damet de Gmeirot emmer em Beld esch öbsi au de Vertrag ihalte

Be de nächste Gmeirotswahl wörd ich Treck 7 probiere
ond de 2. Wahlgang scho vor em 1. doreführe
well de chönntis Gmei am Afang scho Kandidate wod kennsch abüte
ond ich müesst ned we bem Darioli zersch de Uskonft go alüte

Ich ha zom 3. Mol e Wuete mer ich muess das do säge vor alle
well euse wedergwählti Gmeindamme de wot emmer nonig uffalle
er suft ned schriegt keini Läserbrief ond esch glöcklech no onder de Huube
ond schüsse das channer au ned well mer händ z`Rinike jo kei Tuube

Wäg eusere Ffürwehr do hani doch s`letschte Jahr erwähnt
das mer vor luter Üebige bald de Brand nömm gsänd
jo wend du rüefsch mer chöme her Komandant mer rette ond mer spritze
aber eis das wellder grad säge s`Schuelhus das chasch eleige botze

S`letschte Jahr er glaubeds ned do ghey mer de Lade abe
woni ghört ha das`si em Ibärg hend en alti Ruine usgrabe
jetz hämmer scho e Ruine dert hend ond kein Schwein seit en Satz
ond mer send äxtra no eini go boue obe of em Schuelhusplatz

Ich weiss ned wiso die em Dütsche sones Theater mache müend
nor well beme Tescht es paar Mercedes of d`Site kippe tüend
ich wett ämel nach de Riniker Fasnacht ned welle cho luege do
we mänge vo euch wo do enne hockt de Elchtescht no wörd bestoh

Der Komedi⁹⁸

Wänd er me bsueche? Ich be dehei onder „www.komedi.ch“